

P R E F A C E.

nia & fascia en Latin) qui ceint & environne la teste, ainsi que le verbe Grec *δεδειν*, qui vaut autant que lier tout à l'entour & couronner, monstre manifestement. Et estoit aux Romains ladicte bandelette, de couleur blanche: comme aux Perses, de couleur bleüe, toutesfois bordée de blanc, sur le chapeau (qu'iceux Persans nommoient Cidaris, ou bien Citaris) ainsi que nous lisons en l'histoire de Quinte Curce. Or est-il mal-aisé d'entendre, voire non croyable, que Monimé se pendit avec vn chapeau, quelque royal qu'il fust, sinon que nous escoutions Plutarque, qui escrit en ceste sorte: Monimé, ayant arraché d'alentour de sa teste le Diadème, & le mettant à l'entour de son col, s'en pendit, mais comme il ne fut assez fort & se rompit incontinent, O, dist-elle, maudit & malheureux Diadème, qui mesmes ne m'as de rien serui en ce tant triste & miserable affaire! & apres l'auoir ietté contre terre & craché dessus, tendit la gorge à Bacchylides, Eunuque dudit Mithridates, pour la luy couper. Par ces mots Plutarque donne assez à entendre ce qu'auons dit: comme aussi fait vn autre passage dudit auteur, en la vie de Coriolanus Romain, où il est dit qu'vn Metellus fut surnommé Diadematus, c'est à dire, Le bandé, pource qu'il porta longuement vn bandeau à l'entour de sa teste, à cause d'vn mal & ulcere qu'il auoit au front, comme il se fait encore auiourdhuy. Alexandre le grand, comme escriuent les historiens, arracha de sa teste son Diadème, c'est à dire, le tissu royal, pour d'iceluy lier vne playe que Lysimachus auoit receu en la teste. Ce bandeau royal luy fut pour presage qu'il regneroit par-apres, & aduint ainsi. Et à la verité, telle bandelette blanche estoit la marque & enseigne à quoy on cognoissoit le Roy. Et d'icelle fut inuenteur Liber Pater, ainsi que dit Pline. Je laisseray pour cause de briefueté quelques autres lieux & passages, tant dudit Plutarque, que d'Appian, Alexandrin, Suetone, & autres bons auteurs, qui enseignent euidentement quel estoit proprement le Diadème des Rois & Roynes: lequel fut aussi accommodé aux dieux Gentils, voire quelquefois à leurs sacerdotés, lors qu'ils faisoient sacrifices: ainsi qu'il est assez manifesté par ledit Suetone, quand il escrit que Tite Vespasian estant

*Le Diadème des Rois
est fait de la même
matière que les
couronnes des Rois
de couleur blanche
comme aux Perses
de couleur bleüe
bordée de blanc
quelques passages
portent sur le
sujet de ce Diadème
Cidaris ou Citaris.*

*Le Diadème ou telle
bandelette blanche
marque à quoy on
cognoissoit le Roy
Libre pater selon
Pline est le Diadème
Ce Diadème étoit
d'ordinaire un tissu
gentil et se faisoit
de la même matière
que les couronnes des Rois*